



十五

01333

丁文誠公奏稿

卷之十五目錄

黔邊鹽務情形片

光緒四年六月初五日

改設官引票釐局片

同日

裁減勇營口糧片

同日

馬邊善後事宜摺

光緒四年七月初八日

議結江北教案片

同日

都江堰新工穩固片

同日

遵旨覆核東鄉縣案摺

光緒四年九月初八日

都江堰水勢實無衝損民田摺

光緒四年九月初八日

營饗節省勢難裁減摺

光緒四年十月初九日

奏稿卷十五目錄

籌辦滇岸請緩奏銷片

同日

江北廳巴縣計引改歸官運片

光緒四年十一月二十三日

裁革道府規禮籌給公費片

同日

籌撥將軍副都統公費片

同日

修理四邊岸河道片

同日

官運耗鹽以八觔歸公片

光緒四年十二月十四日

滇邊添製師船巡護片

同日

請提官運鹽務徵收抵撥京捐摺

光緒五年二月初八日

黔邊官運丁丑綱行銷引數經徵各款摺

光緒五年

二月初八日

黔邊鹽務情形片

光緒四年六月初五日

再臣於上年七月內將先行籌辦黔邊鹽務改由官運商銷酌擬章程並請撥借各款緣由具奏經戶部核覆奉旨依議欽此各行欽遵在案嗣因山東湖北兩省借款僅准山東巡撫借解銀八萬兩到川臣復於司道各庫陸續籌撥銀四十二萬兩共湊銀五十萬兩飭委候補道唐炯馳赴瀘州設局總理一切事宜並於犍富射三廠設購鹽分局永綦合涪四邊岸暨近邊之各廳州縣設售鹽分局各委妥實幹員分司其事統由唐炯調度俾一事權並將從前貪吏奸商一切營私中飽積弊盡力湔除因事屬創辦頭緒紛繁且期爲將來立久遠之規故不憚一時竭經

奏稿卷十五

一

營之力自上年九月初六日設局直至十一月底成本漸敷鹽勛到岸規模始定十二月初開辦行銷引數逐漸增加臣於每月查閱冊報並隨時細核其具詳各事宜條理精密秩然不紊而於疏引張紓廠困順商情便民食實爲深得要領然臣終以事關重大未經目睹時惕於懷因於此次閱伍道經犍樂各廠集竈戶等詳加察詢皆以官運一行民食頓便及至瀘州調取總局冊簿逐一查對按黔邊額引一萬零七百七十道近邊計引三千八百六十三道共一萬四千六百三十三道截至四月底實已行銷一萬零八百三十四道僅賸引三千七百九十餘道銷數實爲大暢然猶係上年初辦之九十冬三箇月內各計岸原

積有商號售鹽未便令其停秤仍准其與官鹽並銷此中多有占擱必須自十二月計算起始爲官運行銷之始今截至本年四月底止僅五箇月於額引已銷至四分之三除成本五十萬兩不計外實已收稅羨截釐各款銀三十八萬有奇是較之往年銷引已屬加倍收銀亦已增多似此行銷截至六月底本年額引即可銷竣卽能代銷積引臣以目前銷數約計將來截至年底必可帶銷積引一萬餘張卽至少亦可帶銷至六七千張確有把握又查向來商號四岸共二十五家近復新添九家唐炯現在設法使之進入黔地遞設子店日後不惟行銷暢旺課款增多而沿途店棧愈開愈廣黔民得有生計者亦復不少是黔省

奏稿卷十五

二

凋殘之餘卽可藉此興復尤足維持兩省大局而臣所深幸者自邊岸廢弛犍廠五通橋素極繁盛之區盡歸零落今則一旦更新各大小商竈無不踴躍趨公而井河及沿江船戶添造船隻認官運者更數十家各岸商人爭售官鹽者亦不謀而合現在鹽價頓平川黔各岸已有食賤之喜私梟亦因而斂迹合是數者徵之似已大臻成效此半年來札委唐炯辦理官運得手之大概情形也伏念川省鹽務本

國家自然之大利奈近數十年來蠹吏奸商侵欺偷漏弊端百出以致引積至十餘萬張積欠羨截至一百數十萬兩茲一旦整飭而更張之欲祛其弊則錮結甚深不易窺

測欲行我法則煽惑愈眾動相把持蓋若輩之陰蝕此利者已數十年今一旦奪每年百餘萬中飽之利歸之於公欲其不痛心嫉首不可得也故於現在公事昭然共著無瑕可指遂往往造作浮言或以爲喜事紛更或以爲與民爭利而無識者復不求端訊末輒從而附和之冀圖阻撓大計充其私囊辦理實爲費手是全在任事者堅定不拔用能相與有成臣身任疆圻睹川省之積病已深念黔省之流亡難復闢眾謗以謀全局職所應爲何避嫌怨惟候補道唐炯忠正強毅情操絕人其公爾忘私在從前川省辦賊時藍石各逆皆呼之爲唐拚命至今川人尙樂道之後以援黔爲疑謗所傷功棄垂成潔身而退臣此次到川

奏稿卷十五

三

函招再四始允前來卽與之商辦黔邊動中肯綮因奏令總辦局務該道極力推辭臣以此事興辦關係川黔兩省大局且當此財用匱乏坐視一省自然之大利半歸乾沒實無以對

朝廷因誠懇挽留求資臂助該道見義無可辭始毅然承辦自受事以來秉正持廉破除情面行甫半年實已弊絕利興顯著成效而得手尤在商民均利並不爲

國家樹分毫之怨尤爲擘畫精詳然公家之獲益良多而該道之受謗已甚屢與臣言以鹽務規模大定此後循章辦理引課自增惟自知忠直任事雖殫竭血忱恐終爲浮議所敗擬將辭去臣仍激以大義再三勸留將來本屆奏

銷到部其明效大驗自可仰邀

聖明洞鑒惟創辦之初事機正順而辯言亂政亦屬恆情
不得不據實瀝陳於

聖主之前俾實心辦公之人不致動多顧慮然後大事可
集於

國計民生乃有所裨所有數月來辦理官運得手大概情
形謹附片具陳伏乞

聖鑒謹

奏

奏稿卷十五

改設官引票釐局片

光緒四年六月初五日

再川省鹽務向有以此岸之商而兼領彼岸之引又有以此岸之引而另配彼岸之鹽其初意原係視商力之厚薄廠鹽之盛衰爲變通辦理之法詎相沿日久猾吏奸商卽從此因緣爲奸把持漁利遂至句串朦混弊端不可究詰卽濟楚鹽觔從前係以邊計潼套搭配運本屬含混而貪奸之徒覬其轆轤不清易於骹法因而重照影射無可稽核甚至改包加觔一引行兩引之鹽歷年偷漏課釐不可勝計臣自到川灼知其弊是以前擬章程於清釐積引條內請將積滯過多之潼引專配濟楚以後專俟潼引銷竣再准依次帶銷計岸積引使引張與年分截然不紊然後

奏稿卷十五

五

能杜其混淆以絕侵欺之路並將犍富兩廠釐金局酌改爲官引局凡有商人請領引張卽向官引局具呈由官引局員據呈稟送臣署臣卽飭知鹽道將應領之引查明號數轉呈到臣刻卽飭發官引局限定時日轉發各商具領

到廠採配不准稍有稽延以禁書吏人等需索留難之弊俾引張日臻暢銷其課釐一切卽於領引時向本廠局隨呈繳納解赴鹽道庫兌收一面嚴飭各關卡認真盤驗不准仍前改包加觔自是以來凡以前宿弊一律埽盡近日課釐亦漸起色臣惟嚴飭該局員及犍富兩縣催促各商趕領潼引以利行銷而清積滯至川省窮民甚眾向有歸丁州縣俾小販營生之民均得赴廠購買餘鹽挑至該處

售賣從前係設垣經理派委員紳會同查辦謂之垣鹽按
勛抽取釐錢以濟饒需惟該廠委紳亦多係竈戶往往於
此項垣鹽釐金以多報少把持乾沒之弊兼而有之委員
因其勢眾亦不敢過問且鹽無票據所到之處輒被地棍
書巡攔阻搥索窮販積忿成仇動卽糾眾滋事實爲隱憂
臣與道員唐炯熟商現將各垣裁撤於富榮犍樂等廠改
設票釐局派員管理定以每挑捌拾觔爲限不准加多每
挑給予護票一張隨挑抽收釐錢准其挑赴歸丁州縣售
賣沿途關卡驗票放行兵役不得妄拏此則肩挑窮民謀
生有路不致聚積爲梟從此永遠行之旣可借裕饒源亦
可潛銷巨患現在官引票釐兩局一設商民頗爲稱便除

奏稿卷十五

六

他處產鹽地方應如何設法查驗整飭之處由臣隨時體
察酌辦外所有改設官引票釐兩局以利商民而裕饒需
各緣由謹附片具陳伏乞

聖鑒謹

奏

裁減勇營口糧片

光緒四年六月初五日

再川省留防勇營有楚黔川之分其口糧章程亦異楚勇口糧最重計每營每月應支發銀二千八百四十餘兩黔勇次之每營每月應支發銀二千五百餘兩川勇口糧較輕臣去歲到川後查看川省協撥過多庫款異常支絀每遇籌解京饟及各省營協饟並本省滿綠各營兵饟及一切應支各款萬分拮据而楚勇口糧積欠甚多初擬將各營勇量爲裁撤冀省饟項因彼時現辦馬邊夷務攻剿正屬喫緊又查川中幅員寥闊甲於各省且三面皆與滇黔毗連本省之西南各邊夷以及內地之咽喉匪會匪鹽匪時虞竊發而滇黔雖就肅清其中伏莽猶多潛匿於三省界

奏稿卷十五

七

連之處尤慮乘閒滋事巡防查緝未可稍疏詳察情形勇營斷不可少而饟項不繼殊切焦思再四籌商惟有將楚勇等營各口糧設法裁減以期節省庶可彼此兼顧隨於光緒三年四五月起至年底止陸續將裕字營楚勇一千二百名律武營楚勇一千五百名親兵營楚勇一百名湘果營楚勇一百名虎威寶營楚勇二千三百名舊欠口糧饟項算清發給以後口糧一律裁減改照山東勇糧章程支發其湘果營黔勇五百名靖武鄉導營黔勇三百六十名亦改照新章一律辦理至定邊營川勇二百零三名安西營川勇五百名查多疲弱卽爲裁撤另換一面將裕字營楚勇一千二百名分作兩營改爲泰安營檄飭總兵李

培榮統帶又將律武營楚勇一千五百名內分出一千名並合併虎威營楚勇二千三百名共三千三百名分作七營改爲壽字營檄飭參將李培椿統帶此外親兵營楚勇一百名湘果營楚勇一百名黔勇五百名靖武鄉導營黔勇三百六十名合之律武營楚勇一營五百名共一千五百六十名又將定邊安西兩營勇七百零三名另募成軍共二千二百六十三名分作五營改爲安定營因派候補道唐炯開辦黔邊官運鹽務事屬創始人心未定深慮渝瀘一帶私梟抗違必須鎮懾且黔邊各岸地勢橫闊二千數百餘里伏匪游勇在在生事鹽運頗虞阻塞當將此起勇營撥歸唐炯統帶分紮黔邊近邊十數廳州縣布置巡

奏稿卷十五

八

防並於瀘州敘永一路界連九姓夷地及滇省昭通各處添紮勇四百四十名分駐巡哨俾資周密其一切口糧悉改照山東勇糧章程支給此外尙有酌留靖武營楚勇一千五百名達字營楚勇二千二百名武字營楚勇五百名經武營楚勇五百名親兵營楚勇四百一十名武安軍黔勇五百名巡緝左營川勇三百名各口糧亦均改照新章一律支發辦理其餘酌留之游擊營暨戡馬雷越各廳防勇係就地所撥土練其口糧甚輕不在議減之列查山東勇糧章程係臣前在山東巡撫任內時所定較楚勇口糧每營每月可減省銀八百兩因山東各營定章每營向准發給車價川省並無車輛必須酌加長夫以供拔營運送

軍裝之用長夫較車輛口分稍多是以現在切實核計每營每月實可省銀六百數十兩至黔勇口糧以新章比較亦有減無增頗爲節省此次_臣以川地邊腹太廣從前原留各營僅敷分布未敢輕議裁撤致有他虞僅就各該營口糧量爲改減雖勇營並無減少而照新章核算統計各營每年應支口糧較前約可節省銀十餘萬兩之譜實於營務帑項地方均有裨益除隨時嚴飭各該營統領加意認真訓練防緝不得因口糧議減藉口稍涉疏懈外所有改減楚勇口糧章程暨改換營名分飭統帶各緣由謹附片具奏伏乞

皇太后

奏稿卷十五

九

皇上聖鑒訓示謹

奏

馬邊善後事宜摺

光緒四年七月初八日

奏爲會籌辦理馬邊善後事宜恭摺具陳仰祈

聖鑒事竊馬邊夷務經

臣恆訓會同

臣

丁寶楨將迭克沙

匡一帶堅巢各支夷眾畏威投誠及時戡定全境肅清各緣由恭摺馳奏在案嗣光緒四年正月初七日欽奉

諭旨著恆訓丁寶楨督飭該將領暨該廳文武各官將善後事宜實力舉行以期一勞永逸等因欽此謹卽轉飭該將領暨該廳文武一體欽遵辦理去後伏查馬邊夷匪自道光中年倡亂以後數十年來叛服無常固緣未經痛剿之故亦由辦理善後未能周密所致緣夷等犬羊成性而又支數繁多漫無統率且路險林深易於負固若不使之

奏稿卷十五

十

失其所恃有所鈐束勢難日久相安所有一切修礮築堡添設土千百戶土酋土目等事尤須相度地勢酌量情形悉心籌辦不使一著有錯致誤全局以期一勞永逸也前據統領壽字營記名總兵李培椿統領達字營記名總兵張祖雲署馬邊協副將賡良署馬邊廳同知周儕亮具稟以修築礮堡一事因其時正值嚴寒山深雪大難於興工擬待本年二三月閒春暖雪融再行趕辦其添設土千百戶以及土酋土目等事業據該將領等選定添設計左營之夷八支共設土千百戶一名土百戶一名土酋長二十三名土目二十七名右營之夷十五支共設土千百戶一名土百戶一名土酋長二十六名土目三十名皆以黑夷充當

擬先由該廳給與執照一年無事除季賞外稟由

臣等咨

部給與號紙其有病故者仍由本支選充兩年無事稟請酌加賞需三五年無事就其中擇其尤爲知事得力者稟請將土官准其世襲或陞賞頂戴衣物若以後再滋事端輕則柳杖示懲重則革除另選照例治罪如此明定賞罰庶該夷等知所懲勸日久可漸就範圍於邊事當有起色等語

臣

等查添設土千百戶等事自應由該將領等就近

選定詳請驗充其修築碉堡

臣

等未經親歷勢難懸揣臆

斷其賞需各項出納款目有關庫儲亦必酌其盈虛詳加覈實庶免浮費復行檄委敘州府知府史崧秀馳赴馬邊會同周儕亮賡良等查勘明晰速行籌度妥議周詳聯銜

奏稿卷十五

十一

稟覆核辦茲據史崧秀周儕亮賡良繪具圖說稟稱周儕亮會同委員蹇訖於四月初間親至沙匡並兩營履勘地勢中路自黃茅岡右路自白店兒白楊槽前後業已有人開種右營腴沃處所亦漸次墾耕惟左營附近平麓絕少遠者偏處夷巢無人耕作經周儕亮等會商先令兵勇就近處試墾爲舉辦屯田計其有復業墾耕貧民呈請借給牛工籽種者已由該廳於巡防經費項下撥給至修築碉堡處所應修碉者計三十六處應修堡計六處現擬擇要修築先於中路之銅廠溝頭道堰鑽天坡等處修碉數座以達沙匡又由土地坳老營盤花椒坪等處修碉數座以通左營並由茶園堡河口等處修碉數座白楊槽修堡一

座以接右營俟落成後暫撥兵練駐守至現設土千百戶等項薪水口食季賞係仿照雷波峩邊兩廳章程量爲增損卽按年查看加賞各款每年亦不過用銀六千兩之數各等情會稟前來臣等查閱圖內勘定應修碉堡各處尙屬聯貫惟修碉至三十六處修堡僅六處碉多堡少實非現時所宜緣此時侵地初收自廳城以達左右營縱橫數百里漢民早已逃亡殆盡現在一片荒涼非招墾不能爲久遠之計修堡則人恃有守備易於聚集修碉而無人以守之適足以資敵也法當多修堡數座而閒以碉輔之以碉住兵以堡住民彼此互爲犄角用資捍衛俟招墾日衆再行漸推漸廣庶有以制夷而不爲夷所制方爲萬全已

奏稿卷十五

三

於圖內將修碉數處酌度形勢改爲修堡似覺聯貫周妥至目前之堡原不厭多然倉卒之閒招徠匪易應隨修隨卽招墾庶堡不成虛設當經逐一批飭遵照辦理至修築碉堡經費查該廳原有庫存修築碉堡銀四千餘兩經前署廳程廷棨因公挪用銀三千餘兩未據交出飭司追繳僅據繳到銀一千兩因碉堡爲刻不可緩之工未便稍稽時日一面由司庫先行撥借銀二千餘兩足成三千一百五十兩發交周儕亮承領以作修築經費俾得及時趕辦一面勒催程廷棨解繳歸還其賞需一項向來各夷地均如此辦理

朝廷原待以寬大之恩用示羈縻誠不可缺然斷不可稍

有濫溢緣夷性貪而無親近來賞項日增夷情日變若不示之以威信而徒以濫賞敷衍了局不特情同買和夷人適以啟其輕視要挾之心視賞需爲應得稍靳焉則梗頑不服現已飭令該府廳等將此次應給賞需核定實數以後永遠不准加增緣由明白曉示該夷支等俾共知悉而又嚴定侵剋之罰庶幾恩信相孚該夷人或可帖服不至動卽生心至土千百戶及土酋土目須擇其能懾服夷眾者始准承充切不可稍爲遷就免致別滋事端現已飭令該府廳等認真照辦期收實效並再詳審機宜如有尙須增減改易之處再行稟明核奪除俟將土千百戶土目土酋人等挑選如額查明實能懾服夷眾再爲具奏並分咨

奏稿卷十五

三

各部外所有現飭通籌馬邊善後事宜及辦理情形謹合詞具陳伏乞

皇太后

皇上聖鑒訓示謹

奏

議結江北教案片

光緒四年七月初八日

再四川江北教案遷延數年民教積怨成讎枝節叢生幾於不可收拾臣去歲到川卽委員會同川東道重慶府持平速辦並經面飭該主教范若瑟迅速會議辦理乃范若瑟游移矯強遲之數月迄未辦結嗣經總理衙門灼知其弊照會法公使將范若瑟設法撤回本年二月內始行離川接辦教事者爲白德哩其人似較范若瑟平安奈其隨從之輩半皆狡猾嗜利從旁慫恿多方阻撓臣於該主教接辦時卽屢飭委員等會商妥議而倏忽變幻仍然要挾多端白德哩又多不與委員晤面延之兩月仍無了局此次閱伍到重慶接見委員據稟該主教於此案意圖延累

奏稿卷十五

古

藉索重資

臣

當嚴加申飭勒限三日內議明完結適該主

教白德哩來見

臣

亦嚴諭其定限三日會同委員趕爲議

結並令將隨從刁唆之人查禁不准從中干預以壞大局

該主教經此開導頗覺知警當經川東道姚觀元督同委

員張炳堃署重慶府知府慶善及巴縣知縣李玉宣等於

二日內卽行議結該主教親筆書押存據所有以前一切

控案概行註銷其有從前打燬教堂及教民有因案失業

各戶並該教堂有墊給留養教民等款該主教至此亦不

任意多索惟請商明該委員等代爲陳請酌量發給約計

銀二萬九千兩以爲修造撫恤之資據川東道及重慶府

各委員轉稟請示前來

臣

查此項銀兩本不應給惟所稱

撫恤失業教民_臣以該教民等雖係在教究屬中國赤子其因案失業多年實爲可憫所稱撫恤之處尙爲近理似不能不酌示體恤以彰

朝廷寬大之恩至修造打燬教堂從前平民與教民彼此爭角本不應燬及教堂此次所稱修造卽照中國辦法亦應賠修尙非格外訛索_臣權衡至再似尙可行當經諭令准如所請辦理飭由川東道鹽釐項下酌量籌撥分次發給其涪州教案從前原議有端倪詎此次該主教又欲藉詞多索銀兩故爲刁難百計矯強經重慶府知府慶善督同委員孫元超再三會議慶善見其狡展百出力與相抗而孫元超又復從旁說合該主教見此情形無可推阻乃

奏稿卷十五

五

俯首就範惟請委員等轉稟給予修造教堂及撫恤教民各項之資約銀一萬兩並即時親筆書押爲據_臣以涪案

現請各情照前不甚懸殊應卽批准辦理以期一了百了

現在江北涪州各案均已完結惟_臣思此後傳教之事後

慮方長擬飭委員暨重慶府巴縣等會議以後民教交涉

應辦條約斟酌妥協飭令知會白德哩詳細閱看明白永

遠遵辦不致再行滋事除將議結全案另行鈔咨總理衙

門查照外所有江北教案已經議結緣由謹會同成都將

軍_臣恆訓附片具陳上慰

宸廑伏乞

聖鑒訓示謹

奏

奏稿卷十五

共

再川省都江堰向分內外中三江分漑成都十六屬民田
爲利甚溥自咸豐兵燹後民力不繼年久失修每歲盛漲
沙石俱下江身日益淤高而離畢一處爲內外江分水緊
要關鍵復被衝塌一角江流益形洶湧臣上年到川卽據
各屬紳民以水患日甚呈懇勘修臣以江水關繫民田且
鑒於閩省連年水災隨卽督同署成縣道丁士彬帶同委
員兩次親往踏勘河身淤高屬實隄岸亦多衝潰當卽籌
款修理均經奏陳在案查當初估修之時以此工多年未
修水勢橫決灌縣一帶淹沒民田已不下十數萬畝此次
必須認真挑築期於一勞永逸計自上年十二月初開工

奏稿卷十五

七

起至本年三月中旬工竣均飭丁士彬親駐江干督同委
紳妥辦工程頗爲堅實乃自五月十七八日連日大雨至
十九日辰刻江水陡漲一丈九尺有奇滿江濁流水黑氣
腥離畢以下聲如牛吼而惡浪掀騰漩渦噴起上流連抱
大木及長可丈餘之巨石隨波直下至午刻水力益猛內
外兩江高過隄岸將及尺餘二十一日巳刻水復增漲洪
濤澎湃查看水則全行淹沒但聞內外江聲如雷震頓將
人字隄第三道湃缺所築之金剛牆衝塌數丈幸所築之
新工魚背及人字隄並以下各堰分水魚背尙無損折惟
兩岸隄身向係碎石堆砌間有刷動亦無大損至灌縣城
外護城底石大半衝去計自五月十九日起至六月十六

日止水勢始漸平穩臣於水勢洶湧時飭委員嚴加搶護復飭丁士彬親往監督並令沿江查看民田據報均無衝損查都江堰水發源岷山來勢極遠每當立夏以後西邊各山積雪消融加以雨水自松潘理番憑高直下總匯於灌縣城外流往下游勢極奔騰自秦李冰鑿離畢後歷代皆隨時修築我

朝定有歲修並於離畢之寶瓶口建立水則以視水之漲落預爲隄防其水則以一畫爲一尺自出水面一畫起定至二十二畫爲止從來江水盛漲聞未有逾十八九畫者甲子年水大異常亦只至十八畫有奇而下游民田已幾成澤國省城城內亦可行舟幸消退迅速未致大害本年

奏稿卷十五

六

異常泛漲直將水則全行淹沒是合之挑深江身及培高隄岸計之水漲將及五丈有餘詢之沿江耆民均稱數十年來從未見此大水所幸隄防甚早河身隄岸均各加深培高水雖極漲流行通暢且新工魚嘴人字隄及各堰分水魚嘴均形結實故當巨浪排空尙能抵禦月餘以來不惟下游省城及各屬民田毫無損壞卽灌縣城垣偏處江濱亦完善如故一無損折此皆仰賴

聖主鴻福得以普庇平安百姓歡呼同聲頌禱臣事後回

思猶爲心悸現屆七月水勢之盛漲與否未能遽必而經此一番搏激以後各工段當不致再有他虞所有本年都江堰江水大發新工穩固並未傷損民田各情形謹附片

具陳上紓

宸廑伏乞

聖鑒謹

奏

奏稿卷十五

九

遵 旨覆核東鄉縣案摺 光緒四年九月初八日

奏爲遵

旨覆核東鄉一案原奏實無輕縱情事謹將取供定讞各情據實陳明仰祈

聖鑒事竊 臣於光緒四年二月二十四日准軍機大臣字

寄光緒四年二月初一日欽奉

上諭據翰林院侍講張佩綸奏四川東鄉一案丁寶楨取供定讞輕縱李有恆人言藉藉請飭再加覆核等語東鄉一案前據丁寶楨定擬具奏若果案情允協於李有恆罪名不涉輕縱何至尙招物議著丁寶楨再將前案悉心覆核務使情真罪當以雪民冤如前奏稍有出入卽當據實奏明更正不得意存迴護致負委任原片著鈔給閱看將此諭令知之欽此並奉

奏稿卷十五

三

諭旨東鄉一案著丁寶楨再將前案悉心覆核務求平允無稍迴護前兩江總督李宗羲籍隸四川見聞較確並著該前督確切查明據實具奏各等因欽此仰見

聖主哀矜庶獄之至意跪誦之下感悚莫名謹卽欽遵恭錄移咨前兩江督 臣李宗羲遵照去後伏思該侍講職列清班遇災而懼尙慮獄有冤抑正言莊論欲以廣

盛朝欽恤之仁况 臣忝任疆圻尤應留心民瘼冀消愆眚曷敢以案經定斷遽謂絕無遁飾不爲細心推究致冤抑莫由昭雪况罪名卽有出入已蒙

恩准奏明更正更何敢固執成見迴護前非惟有將全案原審各供情悉心覆核往復推求並恐前次委查不實復揀委誠實之員改裝易服再行前往切實查訪嗣接准李宗羲兩次咨送所收唐占元等各控呈到臣更幸有所考核卽經委員前往行提該原被人證到省詳加鞫訊互相印證俾得確情而成信讞茲據委員將訪查情形稟呈前來又據提案委員會同東鄉縣知縣稟稱差傳呈內應提原被人證等內有李春發一案該原告自稱懷疑妄控願具悔結並請將詞內馬擇昭等四人請免申解又宋明芳一案據該原告之妻宋胡氏到案供稱伊夫宋明芳係上年十一月十六日在家病故此次呈控在伊夫歿後並不

奏稿卷十五

三

知情係屬竊名願具切結並將被告鄔定光二名請免申解又監生鄧啟才一案確查縣冊並無鄧啟才之名詞內亦無被告徧傳鄧啟才亦未訪有其人無從傳解又周華貴一案係開縣人被告唐道立曾老六亦係開縣人移關均未喚獲無從提解僅將原告唐占元等飭令自行赴質並將原卷一併提到臣隨督同臬司委員詳加研鞫據唐

占元告向若璠趙尙益告李開邦二案詳訊所供並無確據再三研詰據供實係互相挾嫌誤控請免深究又據鄧洪熙告覃後士一案該原告到案卽自稱並未遞呈係東鄉十二甲民人竊名妄控因傳解恩促未能查出姓名現甘具結再三追詢矢口不移又李仕映陳應奎告冉正杉

等一案訊係控告侵吞津捐之事當經查明係東鄉縣知縣孫定揚周瀚因辦城防動用公款已由清查局飭令該兩任分別賠繳有案其所控經修城工礮臺各情均係該縣應辦公事與袁廷蛟鬧糧之事無涉該原被告等均願具結懇發回縣自行算明由縣稟復核辦以上各案均係虛衷研鞫該兩造理屈詞窮輸服具結並無絲毫勒抑自應分別省釋免究以省拖累其餘數案均匿不到案至被告等共十八名一聞提解均自行赴省投審且查詢多係從前被害之家臣等再三確訊供情確鑿核與前審各供尙屬相符臣竊維決獄之道據供定案據案擬罪一定之理非可意爲重輕東鄉此案傳播甚遠物議實多臣前歲

奏稿卷十五

奉

旨查辦時卽聞外間喧傳李有恆有縱勇妄殺之事意謂武夫輕躁任性妄爲事所必有但使人言不虛李有恆草菅人命罪不容死亟應嚴行按法懲辦以洩民冤當於入川境時隨處留心確探乃傳聞又復異詞有謂李有恆辦理不錯者有謂李有恆辦理稍過者臣心竊疑之以人言無定必得東鄉民人詳訊方足以得真情因思此等重案奇冤臣到川後接踵赴訴者必多當於沿途收受呈詞細心查看乃自入川至省前後共收呈詞一千二百數十張東鄉控案僅有三張係告理田土之件而於李有恆此案並無一紙呈控迨接篆月餘始有以勇丁妄殺控告一呈

查訊實係梟首馬洪崙之子及其夥黨數人因恐此案牽連辦罪是以先行遞呈以冀倖免當卽據情駁飭惟時臣

一面將原卷詳細翻閱一面遴委候補知府熊紹璜暨新

任綏定府志潤等確切訪查稟呈並卽將李有恆營勇裁

撤飭調赴省聽候查辦復將已經提到各人證督同臬司

暨委員等逐日研訊嗣陸續據熊紹璜等將查訪情形稟

覆前來臣復督同藩司程豫臬司方濬頤並委員等提集

全案人證研訊而事隔年餘袁廷蛟供詞初猶狡展幸全

卷具在其滋事之始末辦理之情由皆有呈詞稟報札文

書函各件歷歷可考又有提省應訊之人證可質臣由是

詳採輿論確核卷據研訊衆供又參以委員等所查各情

確悉此案起事根由係因東鄉地方從前征收錢糧各項

多有浮收袁廷蛟住居十二甲本係革役素行狡猾遂藉

算糧爲名陰圖斂錢使用十二甲之人被其煽惑以至一

呼百應聚衆滋事曾於光緒元年糾衆圍城一次當時意

圖解散未經究懲以後錢糧亦卽遞減此次袁廷蛟復藉

名算糧愈加膽玩逐日糾領多人沿鄉滋擾甚至圍城逼

令該管知府立時減免錢糧並勒傳局士到府算帳該府

一一允從猶不解散彼時又句有開縣著名土匪吳奉山

帶領匪黨多人一同滋擾其勢寢大乃派令綏定營弁兵

前往彈壓袁廷蛟等又復恃衆抗拒圍剝兵丁號衣軍械

搶去營弁馬匹勢益鴟張署東鄉縣孫定揚張皇失措卽

以縣城危在旦夕稟報前督臣吳棠以袁廷蛟兩次圍城此次句有土匪深恐蔓延爲害意圖速剿以免巨患由是調派李有恆王照南謝思友金德成等分帶各營前往會勦又嚴檄各該營迅圖掃蕩迨護督臣文格到任恐被脅者多橫遭殺戮復檄委知府王元晉等前往會同各營勦撫兼施其時李有恆已經到防查知此事由於鬧糧卽會同王元晉等擬具解散脅從只拏首惡告示稟明護督臣文格照辦故到防半月有餘均各按兵不動只查拏袁廷蛟一名嗣官渡場團局被土匪王廷英等搶毀局士等赴駐紮該場之虎威後營劉道宗營中喊報劉道宗始派人將王廷英拏獲而袁廷蛟遂卽率衆圍攻營盤逼索王廷

奏稿卷十五

三

英甚急其時官渡場人心皇皇皆求救於劉道宗劉道宗乃出隊迎擊殺斃五人袁廷蛟始退踞尖峯寨中李有恆見袁廷蛟久無弋獲之期始自行帶隊前赴該寨查拏詎該寨旣不獻出袁廷蛟又不指明袁廷蛟所在復不准將弁進寨查看輒行飛石抵擊勇丁被傷數人各營始忿激攻寨相持多時將寨攻破殺戮二百餘人老弱婦女撲巖墜死有之勇丁亦復傷亡多名袁廷蛟仍趁勢逃逸未獲臣當日親提堂訊三面環質袁廷蛟狡辯俯首認罪是以將袁廷蛟照謀叛已行律擬斬劉道宗與雷玉春管帶營勇紀律不嚴且劉道宗有攜眷赴營一事尤干軍律將劉道宗雷玉春擬以發往新疆軍臺効力贖罪李有恆爲虎

威實營統領於所部劉道宗攜眷隨營管帶勇丁紀律不嚴失於覺查擬照溺職例革職奏奉

諭旨允准茲恐李有恆罪名輕縱欽奉覆核遵卽謹就

臣

所取各供所定各讞證以此次委查情形並參以李宗義咨送各呈之原被人證各供情悉心考究均與前審尙無出入臣竊維李有恆罪名輕重應以是否妄殺爲憑而是否妄殺又必以袁廷蛟等是否圍城拒兵通匪燒搶撲營爲定此案袁廷蛟等糾衆鬧糧本干例禁然究之係從前地方官實有浮收情事袁廷蛟等僅只鬧糧係事出有因尙可從寬辦理至於糾衆圍城脅制官長甚而拒兵通匪燒搶撲營則是罪有應得臣當日辦理時就案辦案自必

奏稿卷十五

五

以李有恆與袁廷蛟兩相比擬以憑定斷蓋袁廷蛟無可誅之罪則李有恆卽在應死之條若袁廷蛟罪有可誅則李有恆卽難擬以重罪緣決獄之道無兩不是理事然也臣審辦此案時於兩相比擬外猶不欲爲李有恆恕何也李有恆究係統領辦事須識輕重如果當初孫定揚請兵援勦吳棠派各營前往辦理札內聲明袁廷蛟等因糧滋事飭令馳赴該縣妥爲彈壓迅圖安撫以靖地方並無攻勦掃蕩字樣李有恆到防後卽率爾興兵肆行攻勦則其妄殺冒功仍屬罪無可逭是不獨議以革職爲輕縱卽議以遣戍亦爲輕縱又使李有恆奉有勦匪之札而到防後明知爲藉糧起事並非謀逆乃不先行安撫卽便臨之

以兵致令良莠不分玉石俱焚是其藉事貪功亦難輕恕又使稟明出示只拏首惡罔治脅從而張貼告示後袁廷蛟等並未別滋他事遂行率眾攻勦是該民等尙無抗犯官軍之迹官軍卽有攻勦之舉臣雖一時愚昧輕縱於前仍當再定爰書以期情真罪當乃李有恆所奉者勦辦土匪之札而於開糧一事未之知也及其到防後查得實情則不敢照札辦理先行會同委員稟明出示只拏首惡罔治脅從似與不知輕重者有閒迨至袁廷蛟捆獻無期而又恃眾撲營踞寨抗拒勢不能不帶隊查辦及帶隊搜查而寨中既不獻出袁廷蛟又不將袁廷蛟實在蹤迹指明遽行飛石擊禦揆之當日情勢萬難束手此時酌理準情

奏稿卷十五

三

李有恆實無重罪可科茲經

臣再三確核前次辦理歷歷

敘明實無絲毫掩飾如李有恆果能科以重罪

臣固與之

素無一面亦並不相藉重又何惜置之於法而甘蹈欺罔

之罪也至該侍講原奏所稱或謂李有恆賄囑劣衿爲之

訴冤

臣墮其術中或以

委人密訪不得其情或以

臣先

有成見或以爲迴護文格該侍講已云不以無憑之說遽

爲定論

臣

亦何庸多辯惟查李有恆有無賄囑劣衿無從

查究至訴冤之說

臣

到川後接據各紳糧所遞呈詞多係

因袁廷蛟等搶掠財物燒毀房屋受害最慘懇請懲辦之

詞及提訊各供亦無爲李有恆訴冤之語至事後梟匪馬

洪崙之子及其餘黨以勇丁妄殺控告訊明實係爲倖免

株連起見且所控又係管帶律武營雷玉春勦辦雷公寨之事與李有恆所辦尖峯寨無涉當經批駁在案實無爲李有恆訴冤之事至前委員查訪臣到川後辦理此案因思李有恆在川多年交游必廣若隨意委員深慮有所瞻徇乃博訪周諮得悉熊紹璜於同治十三年曾經前督臣吳棠檄委採辦木植該員失查家丁人等在灌縣一帶地方招搖生事適李有恆住紮灌縣曾據實稟經吳棠將該員撤委查辦有案可稽意謂以直報怨人情大抵皆然特飭其嚴密訪查自能盡發其底蘊復恐其假公報私並委知府李傳駿同往以期事歸公允確得實據迨熊紹璜等查明稟覆於素無嫌隙之劉道宗則曰攜眷隨營實有其

奏稿卷十五

毛

事而於向有積怨之李有恆則曰縱勇妄殺實無其事言出仇口論豈違心且據綏定府志潤東鄉縣梁融陸續稟復亦皆後先一律與此次委員查訪相符似無虛飾案既屢查而得真情臣實不敢執成見而招物議至於此案臣

從前聞人傳說彼時亦深忿恨謂必嚴辦以洩民怨以肅戎行是臣當初本有重處李有恆之成見實無輕縱李有恆之成見嗣經細閱全卷詳審各供始怪耳聞之言不及目覩於是就案推詳爰書乃定據供擬罪議以革職若謂議抵無人原係平情之論但查民命固多傷斃而弁勇亦復傷亡現在荒塚尙存均可指證是殺由抗拒例難擬抵臣所以不敢固執成見實欲期情法兩得其平也至文格

辦理此案其於會匪吳奉山等則嚴飭痛勦而於袁廷蛟等則劃清界限飭令分別良莠勦撫兼施實亦正辦且於營勇滋擾一節未經查實續奏已自請議處更無庸爲之迴護况案經奉

旨查辦如辦法果有不善雖迴護只滋罪戾何能掩飾臣又何甘代人受過自蹈愆尤也所有遵

旨覆核東鄉全案實無輕縱李有恆各情除由前兩江督臣李宗義遵

旨查明自行具奏外謹將取供定讞照例擬辦覆核無異各緣由據實具奏伏乞

皇太后

奏稿卷十五

天

皇上聖鑒訓示再此摺覆奏較遲實因再行委查往返需時又行提李宗義咨送呈內各原被人證解省復訊是以稍稽時日合併陳明謹奏

都江堰水勢實無衝損民田摺

光緒四年九月初八日

奏爲本年都江堰水勢異常盛漲沿江民田實無衝損所築新工惟兩岸碎石隄身間有衝刷餘均穩固恭摺據實覆陳仰祈

聖鑒事竊

臣

於光緒四年八月二十八日承准軍機大臣

字寄光緒四年八月十二日奉

上諭前據丁寶楨奏都江堰頻年泛溢衝毀民田現設法籌款修理旋聞該處江流盛漲民間已被水災正以新築工程能否可靠地方被災是否深重廑念方殷茲覽該督所奏情形都江堰水泛漲異常與朝廷所聞無異惟水勢高過隄身濁流洶湧歷時將及一月沿江田廬必多淹沒

奏稿卷十五

三

且從前盛漲下游已成澤國此次水大於前所稱沿江民田均無衝損殊難憑信至隄身既有缺動能否搶護平穩不致大損所築新工有無損折能否一律結實恐有不實不盡之處丁寶楨當嚴飭丁士彬認真履勘據實稟報再行詳細奏聞不准稍有粉飾並將興築隄工隨時保護完善被災地方加意撫恤毋令失所將此由四百里諭令知之欽此

臣

跪讀之下仰見

聖主軫念民依視遠猶邇之至意欽感莫名伏查都江堰水本年異常泛漲據本地土民均稱爲數十年來所未有當水勢極大時

臣

亦懸慮新工難資抵禦民田必致衝沒

亟於五月底飭丁士彬前往督同水利同知及灌縣等縣

設法搶護並飭各州縣查明民田有無衝沒隨時稟報乃自五月十九日起至六月十六日止水勢漸平所有新築分水各魚嘴人字隄及兩岸隄身均未損折惟五月二十一日已刻內江離輦以前之水漲高一丈七八尺有奇氣色腥黑屹如山立不上不下灌城居民驚心駭目呼號不絕但聞離輦腳下聲如牛吼滿江洪濤澎湃有同雷震歷時許至申正濤頭忽轉向人字隄噴擊勢如電掣立將人字隄後第三道湃缺所築護隄之金剛牆衝塌三丈餘水勢豁然由此奔赴外江分流中江始就平順查看人字隄毫無損折惟兩岸隄身向用碎石堆砌濁流經過間段均有衝刷隄岸並無傷損此外各工均各完固民田均一律幸獲保全

臣

前奏實係確切情形並不敢稍有掩飾第此次水大異常民田何以不致淹沒不惟

朝廷不能釋疑卽

臣

當時目擊心維亦深詫異茲謹將實在情形敬爲我

皇太后

皇上詳陳之查都江本爲川江正流導自岷山來源極遠自松理各屬入川境奔騰而下至成都府屬之灌縣上游十里許地名白馬堰爲一總匯流入腹地每當夏令西江外各山積雪消融加以大雨時行汛期必有漲發其向來江水經行之正江卽今之所謂外江也外江僅一河水勢過大不能容蓄每多漫溢故秦李冰鑿離輦以分江水始

將正江別分一支今名曰內江而於外內江下流之十餘里又分一支以資宣洩名曰中江自後三江並流水勢既殺而民田分受灌漑可免泛溢爲利甚溥溯查分江之始係於江口之白馬堰以下三里許創建分水魚背一道以長數丈之竹編爲竹籠中載巨石排列江心深入水底丈餘復用徑數寸之鐵椿數十根釘入江底穿繫竹籠層層堆列高出江面一丈數尺至二丈數尺不等其籠石排砌頭小尾大形如魚身分水之處名曰魚背其分水係審定下游地勢之高低以定水口分水之多寡原立水誌流入外江者四分流入內江者六分不容稍有增減並著有深淘灘低作堰二語爲修理江身準則迄今數千年咸守其

奏稿卷十五

三

法不敢改易且自是以後代有歲修所以防盛漲水落沙石淤積也自近數十年來久失修理不惟內中分支之兩江淤成平陸沙石壅塞高過隄岸卽外江爲江水正支江身淤墊亦幾與隄岸等故歷年來一遇水漲民田率多衝沒卽灌縣一屬查核已至十餘萬畝不可復識至甲子年水勢盛漲下游幾成澤國以旋漲旋退幸無大傷臣上年到川卽據灌縣各屬紳民呈懇興修臣詳詢之官紳均稱江身淤塞情形萬難展緩當時猶未遽信因督同丁士彬暨委員自灌縣上游之白馬堰起逐一履勘詳看水口之分水魚背實屬廢壞不堪外江之水大半灌入內江又從灌縣城外查看至下游之十餘里地名新都堰卽係中江

江身則見外中內三江悉已連成一片水勢亂流固無所謂三江之分且併爲一江而亦不能順軌迨由新都堰江身憑高遙望下游省城及成都十六屬俱形同釜底彼時查看卽慮次年若有盛漲成屬必爲澤國始決意估勘工料奏明籌修飭委丁士彬帶同委員等親駐江干趕緊辦理其時已在冬初丁士彬以工大費繁爲時較晚先將江口之分水魚背照依古法加工重修並飭委員會同灌縣知縣將內外中三江分起同時並辦先將三江分出正身由外江興修至中江又由中江至內江每支江身挑深至一丈二三四尺不等一面將挑出江身之大小碎石卽以培修隄岸隨地勢江身之高下相度施工地之低者增高

奏稿卷十五

三

至一丈六七尺及二丈四五尺其高者培修至七八尺丈餘不等合計外中內三江挑深培高約計七十里三分有奇復將三江之各分水魚背重行修築其人字隄一段爲內外江束水最要關鍵亦從新撤去朽壞籠石另行添工建修加寬加厚並自人字隄第三道起每道用一魚背順水沈入江心中流高出水面數尺以禦湍激而保離隄至三月十八日始行竣事

臣

飭委藩司程豫親歷驗收工程

實爲堅實

臣

竊惟此次籌修都江堰本因江流淤塞恐害

民田不得不爲此大舉當建修之初實已慮及盛漲爲災故飭丁士彬親住江干監督修理

臣

亦於去歲冬臘兩月

前往查視不准分毫草率偷漏以期抵禦洪流且擬圖數

十年之安幸丁士彬與各委員等均能實事求是逐日沿江監督工作毫無偷惰故本年水勢甚盛所築各工段一無損折至民田之不致淹沒者實緣三江江身從前淤成平陸今仍疏復舊制且益以江身挑深江岸加高故水雖極漲而在江口以下離峯以上之數里岸窄水陡則見其高一過江口離峯以下三江分注水勢自殺再加以下各堰分段淘濬愈分愈平江身既無淤塞水流自行暢利故民田只受灌溉之益而絕無衝沒之患也夫以臣當興工之時亦自信有此一修卽遇盛漲必不致有害農田然初不料水勢之大至於此極迨後水勢極大而工程並無損折民田一無被淹此實仰賴

奏稿卷十五

三

聖主如天之福江流順軌蜀民得普庇平安實非微臣意料之所敢及也現在秋收已畢成屬實計八分有餘米價自七月中旬至今較六月以前減落十分之四至闔省收成均大略相同民情頗爲安帖洵足上慰

宸廑凡此皆明明在人耳目不煩稽查而知臣斷不敢稍

有欺飾除俟十月水勢大落後所有兩岸堆砌碎石隄身閒段衝刷各處及人字隄後衝塌之金剛牆三丈餘謹遵旨飭令丁士彬親往補修齊整以禦來年盛漲並將所築各工程分晰奏咨核銷外所有本年江水甚大新工並無損折民田亦無淹沒及兩岸碎石隄身閒有衝刷各緣由謹繪具圖說恭摺據實覆奏伏乞

皇太后

皇上聖鑒訓示謹

奏

奏稿卷十五

十四

營饗節省勢難裁減摺

光緒四年十月初九日

奏爲川省勇營饗需節省已多現在勢難裁減恭摺具陳仰祈

聖鑒事竊准兵部咨會同戶部具奏各省軍務大定亟宜酌裁勇營以節饗需飭將留防勇丁陸續裁汰以半年爲限統裁十成之一並將裁存勇數應需月饗管帶員名駐紮處所分晰奏明以備查核等因奉

旨依議欽此欽遵咨會前來臣當卽遵照轉行督同在省司道詳加酌核伏查川省留防勇丁至光緒三年尙存勇一萬五千餘名臣去歲到任之初竊見庫款支絀異常籌撥京協各饗及本省應發之款萬分竭蹶卽擬於勇營量

奏稿卷十五

三

爲裁減冀節糜費及至悉心體察其勢竟有所不能緣川省幅員遼闊甲於各省且三面皆與滇黔毗連本地之西南各邊夷以及內地之會匪梟匪咽喉匪時虞竊發現雖滇黔已就肅清其中伏莽甚多潛匿於三省毗連之處尤慮乘閒滋事所特有各營勇巡防查緝俾資周密以期有備無患卽如上年十二月間羅江縣有匪徒董麻二等聚衆滋事戕害汛官本年二月間南江縣有匪徒張偉堂等藉荒構亂拒殺局紳現在西陽州秀山縣與黔楚交界之處近又有瀧頭帽頂吳才標等謀爲不軌之事均由駐紮該處之營勇星馳前往立卽撲滅均經臣隨時奏報在案是皆深得營勇之力俾不至釀成巨患其餘亟應巡緝之地

尚多

臣

每於調遣時常慮不敷分撥故欲裁而不能遽裁

然饗項不支深以爲慮因思裁勇不如裁饗川省防營俱係楚勇其口糧章程最重此外又有黔勇數營口糧次之是以去年自五月起至年底止陸續將楚黔各軍分別點驗另行改立營名所有應支口糧無論楚黔均一律改照東勇章程給發通盤計算每年可省銀十數萬兩亦經臣附片奏明在案是勇營雖未裁減而勇糧之節省已多且查防勇內有安定營二千二百六十三名臣因黔邊官運鹽務以荒廢二十餘年之區一旦開辦事屬創始人心未定而瀘渝一帶河道紛歧私梟出沒阻抗必須鎮懾以通銷路臣竊計勇營難以再增遂抽出安定營一軍係專派

奏稿卷十五

三

爲黔邊鹽務巡防之營不在腹地存勇數內况黔邊各岸地勢橫闊二千數百餘里以二千餘人分紮黔邊近邊十數廳州縣布置巡防已難周密現在黔邊鹽務已有起色

臣

擬卽行接辦滇邊地勢益寬私梟尤衆將來應行分駐

巡防之處又加一倍現擬仍以該營分撥駐防其能否足

敷分布容俟查看情形再行籌辦且查該營全軍經總辦

黔邊鹽局候補道唐炯目擊川省庫藏空竭慨然自任已

將該軍所需口糧於本年六月初一日起由該道於鹽局

內自行設措籌給並不再動釐金津捐稅課等款與正項

錢糧毫無關礙卽此一軍司庫每年節省又在十六萬兩

之譜是目前川省防軍經臣此次設法籌辦名雖未裁而

以年中所省餽項計之實較部臣所議統裁十成之一幾逾數倍似未可再議裁汰致滋他虞竊維川省近年虛擁富名其實司庫毫無存積現值京餽及各省營指撥協餽並本省滿綠各營月餽藏餽暨各項應用不可緩之需以一年全省所入綜計其不敷出者實不下一百五六十萬兩臣每於各省羽檄交催時與藩司仰屋持籌莫名焦急時艱所屬但有可以節省之處斷不肯稍涉遷就自貽伊戚况經部臣深謀遠慮關懷大局何敢不遵照辦理無如事有萬難實不得不面面兼顧期於餽需勇營兩有裨益也至各營勇丁均係挑選精壯足數派員管帶無事則勤加操練有事則隨調隨行一年以來臣明查暗訪該管帶

奏稿卷十五

三

等均各恪遵紀律實心辦事尙無向來積習虛報勇數冒領餽銀等弊除再隨時察看情形酌量辦理並將存勇數目管帶員名及征防處所查照向章於年底造冊咨部外所有查明川省勇營餽需節省已多現在勢難復行裁減各緣由理合恭摺具陳伏乞

皇太后

皇上聖鑒訓示謹

奏

籌辦滇岸請緩奏銷片

光緒四年十月初九日

再前准戶部咨滇邊向係川鹽口岸應上緊設法辦理以杜私梟而保川綱等因查滇岸鹽務前臣於籌辦黔邊摺

內業經聲明運本無出須先將黔岸辦理就緒再行以次

接辦現在黔邊運銷已著成效亟應乘時辦理臣現與總

辦黔邊鹽局候補道唐炯力籌運本擬於十一月內卽行

開辦仍委該道就近在瀘局兼行綜理俾省經費其一切

應辦事宜唐炯熟悉情形臣令其查照黔邊章程斟酌該

處時勢統歸官運商銷如實無商承領卽歸官銷以免停

待惟查滇岸頽廢已逾二十餘年川省私販視爲已物動

輒挾衆抗拒而滇省之白鹽黑鹽琅鹽各井鹽亦復從中

奏稿卷十五

浸灌是該岸兩路皆私蝕利已久一旦規復舊制辦理似

較黔邊頗爲棘手且運道又復紛歧尤虞阻格臣與唐炯

日夕籌商此時開辦滇案應將川邊私梟先行堵遏使川

鹽之行滇者先有藩籬可恃然後查明滇私來去之路再

行設法清理俾界限分明兩省私販不致牽混斯銷路乃

不虞阻滯茲擬將川省界連滇邊之宜賓南溪屏山慶符

長甯高縣珙縣筠連興文江安馬邊雷波十二廳縣各計

岸併歸官運用作藩籬以杜內地梟販攙越之路先飭鹽

茶道查明滇案本年之引及歷年積引各若干張暨十二

廳縣已領未領新舊計引各若干張開具清單連引張一

併交付瀘州黔邊鹽務總局趕爲部署並籌辦購運一切

事宜以免延誤第冬月開辦必須先行購鹽並確查水陸
運道難易以及試辦有無商人承銷各事大約開運行銷
必俟明春正二月內乃能一律就緒將來奏銷期限應限
至六年二月作爲一年期滿始能辦理至行運章程現在
查照黔邊試辦以後如應有變通之處容臣督同唐炯於
行運時再爲查看滇岸詳細情形悉心妥籌隨時奏咨期
臻周妥所有現擬開辦滇邊鹽務緣由謹附片具奏伏乞
聖鑒訓示謹

奏

奏稿卷十五

三

江北廳巴縣計引改歸官運片

光緒四年十一月二十三日

再臣於去年秋閒奏辦黔邊引鹽改由官運商銷案內聲明將界連黔邊之瀘州合江綦江十餘州縣計引並歸官運復因永甯江津南川三縣均與滇黔犬牙相錯亦改由官運以杜計商私販攙越邊岸之路自開辦以來邊計兩岸均有一定界限不致混雜私販既少侵灌銷路自覺暢行惟查重慶府屬之巴縣江北廳界在瀘合涪綦之中近年乏商領引均暫交行號代銷本非長策而代銷之行號又多係教民承充現值民教多事亦不可不防其漸此時上下游之瀘州江津涪州等處引鹽既歸官運則中間之巴縣江北廳計引均應一律歸官以免錯雜而滋隱弊臣已檄行鹽道將巴縣江北廳未完光緒四年分引張提歸黔邊鹽務總局定於光緒五年正月初一日爲始改歸官運仍照黔邊章程發商行銷茲據鹽茶道蔡逢年署川東道唐炯先後具詳前來理合附片陳明伏乞

聖鑒謹

奏

奏稿卷十五

罕

裁革道府規禮籌給公費片

光緒四年十一月二十三日

再臣前准部咨欽奉

上諭以各省陋規相沿殊屬不成事體著該督撫嚴飭所屬將各項陋規悉心裁革儻有仍蹈前轍者卽著隨時奏參懲辦其臬司道府公費著體察各該省情形悉心議奏等因欽此伏查川省臬司道府向來除養廉外別無津貼之款而養廉項下例有扣平搭票折錢及本省應行攤捐各款層層減折所贖無幾從前收受節壽規禮非此無以辦公贍家故二百餘年相沿未改中外共知實有不得已之勢然終非正辦去年秋間臣以川省臬司向來亦收受陋規名義尤爲不正當經飭令刪裁而刪裁之後辦公竭

奏稿卷十五

聖

蹶因奏明於本省籌備公費項下酌量勻攤幫貼俾資辦公其成華兩縣地處省會一切應辦公事尤爲繁冗動形拮据亦經奏明酌量籌給津貼以免苦累均經欽奉

諭旨 在案當時卽擬裁定各道府公費惟因款項一無所出若遽將從前陋規一律裁革實難責令枵腹從公然終任其仍沿舊習亦無以表率屬吏正籌畫閒欽奉前因仰見

聖主於澄敘官方之中仍寓優恤臣工之意莫名欽感復查川省全年正額丁糧共止六十餘萬歷無糧折漕費等項與江西安徽各省可以取資於漕羨者情形不同省庫實無閒款可籌惟自去冬開辦黔邊鹽務以來各岸局於

購鹽售鹽之際照商行收扣平餘銖積黍累湊少漸多原以備各該局一切公費茲據總辦局務候補道唐炯稟稱各該委員等均能實事求是共矢清白力求節省咸願將此項餘積辦公銀兩擬俟積有成數卽以提撥各道府每年辦公之用等情查此項收扣平餘旣非課稅義截正項所入又係各局員節省所積並非另取之公家且視別省漕折公費取自民間者更有區別以之提撥道府公費實爲名正言順臣現擬自光緒五年正月起卽於黔邊鹽局收積平餘備公項下酌提成數審定各道府缺分繁簡均勻分撥准其備文赴局領回作爲辦公經費各該道府旣有此項領款辦公不致掣肘卽明定禁令嚴飭自光緒五年正月起將從前一切節壽規禮永遠裁革不准再收分毫以勵廉隅而資表率如查有私受規禮情弊卽將該道府指名嚴參並將私自餽送之州縣一併參處用昭儆惕在上官無須取給於屬員自不難破除情面整躬率屬使屬員無從求媚於上司不敢不恪遵令甲共肅官方以期大法小廉吏治日有起色除分飭該局及各道府迅速遵辦外所有現擬裁革道府規禮籌給公費緣由理合附片具奏伏乞

奏稿卷十五

聖

奏
聖鑒訓示再川省道府州縣攤捐一項從前有奏明專支之款應如何分別裁減之處容俟查明另辦合併陳明謹

籌撥將軍副都統公費片

光緒四年十一月二十三日

再查成都將軍統轄旗營公事較簡第有兼轄松建各屬地方之責應辦要事亦多而署中辦公之需除廉俸外一無所出每遇公事動形掣肘臣目擊其竭蹶亦代焦急卽成都副都統例定廉俸更屬無多贍家時虞不繼辦公更屬爲難茲臣亦擬於鹽局扣收平餘提撥道府公費項下再行勻撥數成酌給該將軍副都統按季備領藉資津貼俾辦公一切不致輒多賠累庶期整頓地方實於公事有裨謹附片具陳伏乞

聖鑒訓示謹

奏

奏稿卷十五

聖

修理四邊岸河道片

光緒四年十一月二十三日

再據黔邊鹽務總局候補道唐炯郎中文天駿會詳竊查川鹽入黔向分四岸轉運一由納谿泝至永甯小河二百餘里爲永岸運黔要道一由合江泝至貴州茅臺村小河五百餘里爲仁岸運黔要道一由江津江口泝至貴州松坎小河六百餘里爲綦岸運黔要道一由涪州泝至貴州龔灘小河八百餘里爲涪岸運黔要道此四小河發源滇黔分流川江皆窄峽崩崖激湍亂石節節有灘自去年開辦官運以來鹽船經過每至險處觸石卽漏必須提載加緯萬分艱難非議修淘難期暢利現據紳耆商民等公稟自願捐貲集款因勢利導酌加修治以利舟楫俾官商均

奏稿卷十五

四

可暢行鹽船無虞失事而沿河窮民更可以工代賑於邊地商民大有裨益俟此工告竣如果經費有餘再妥議歲修河道及四岸陸行險路以便行旅而期久遠該局現已委員分岸查勘並傳詢商民衆議僉同惟茅臺松坎等處均係貴州地界現擬興工一律修淘慮黔中官吏未悉底蘊應請先行奏咨等情前來

臣

查川省各岸運鹽入黔河道多係灘高岸窄亂石縱橫久未修淘舟行實形滯礙現

據商人自願捐貲修治以通運鹽之路自應如議照辦以重鹽務而暢銷岸惟此次工程係屬商捐商辦分釐不關公款自可無庸造報相應請

旨敕下部

臣

免其報銷仍由

臣

檄飭局委各員督率商人

一體認真辦理務使工歸實際除咨明貴州撫臣外理合

附片具奏伏乞

聖鑒訓示謹

奏稿卷十五

聖

官運耗鹽以八觔歸公片

光緒四年十二月十四日

再臣開辦黔邊鹽務前經擬定章程議於每包正額一百五十觔外酌加十觔以備滷耗於銷售時如有賸出餘鹽卽逐包分記呈報另立專款以作津貼局中各項公用支銷業經奏明奉部覆准遵行在案查此項耗鹽十觔當時議辦之初原以官運雖可免夾帶之弊而由廠買鹽捆運以及沿途起撥暨到岸後起載上倉盤弔等事輾轉費手滷耗必多與商行無異且官運係屬創始一切無所遵循各廠局委員均係初次經辦於鹽運事宜尙未窮原竟委亦慮滷耗稍多關繫成本不得不加意慎重是以酌議加耗實以備不虞也茲據總辦黔邊局務候補道唐炯詳稱

奏稿卷十五

五

該道於開辦時卽剴切示諭廠竈俱煎紅鍋好鹽官局照色加價收買鹽質既好滷耗自輕至捆運押運起撥上倉盤弔等事又嚴督各局員事事躬親力求真實自上年十二月鹽觔捆運到岸後該道卽逐細稽查折耗不過十分之一當於初次核本時卽將此項耗鹽十觔應征正雜各款均攤入每包一百六十觔內到岸後卽以淨鹽一百六十觔照價發商承銷是此項耗鹽十觔悉數作爲正額全歸公款並未提出另立專款作爲津貼公項之用計自開辦起截至十月底止此十箇月內歷次詳查所有滷耗及運載各項折耗爲數實屬無多應將此項耗鹽十觔永遠歸作正額核算歸入公款俾免日後別滋他弊等情詳請

具奏前來臣查唐炯所請實爲核實辦公杜絕隱弊亟應照行惟思鹽船滙耗斷難保其必無卽捆運撥載等事水陸兼備意外折耗亦恐不免若如該道將耗鹽悉數作爲正額核算俾涓滴皆公辦理誠爲結實第恐日後或稍有滙折則局中無款彌補卽各局員竭力趨公若以滙折之餘責令賠償亦殊失情理之正且明春開辦滇邊商力疲憊所有運鹽水路久爲兩省私梟盤踞充塞官運初行之時非得礮船往來巡護則銀鹽經過在在堪虞現飭該道酌量製造舢板船十號選募水勇駕駛沿江防護以遏私路此項師船經費亦須自行籌發不准再動正款臣擬卽將此加耗鹽十觔先以八觔作爲正額核計悉數歸公暫

奏稿卷十五

聖

行酌留二觔藉備各廠局鹽運或小有意外折耗稍資幫補並開辦滇邊雇募礮船水師之費均歸此項動支庶幾事歸實際而於辦公一切差覺裕如以後仍飭該道再行隨時詳查情形如鹽船實在無甚滙折仍卽將此項酌留之二觔加耗除支銷水師礮船外餘仍悉數入正歸公以期盡絕弊端永昭核實所有加耗鹽觔悉作正額全數歸公並請暫行酌留二觔以備公費緣由謹附片具陳伏乞聖鑒訓示謹

奏

滇邊添製師船巡護片

光緒四年十二月十四日

再滇邊鹽務

臣

已將明春開辦一切情形陳奏在案惟查

滇岸距廠寥遠從前承平之時鹽運已屬不易自二十餘

年荒廢之後商力疲憊川滇兩面皆係私梟充塞盤踞而

運道所經沿江一路尤爲艱險官運開行之時銀鹽往來

倍關緊要

臣

與總辦局務候補道唐炯再四熟商非得師

船攔截巡護恐多疏失現已飭該道在於重慶購料製造

舢板礮船十號選募得力水勇在於沿江駕駛操練往來

巡防至造船及募勇一切工料口糧應歸鹽務公費內撙

節開支不動正款如此辦理庶鹽銀經行各處可免他虞

而私販斂迹官引乃期暢行實於鹽務有裨除咨部查照

奏稿卷十五

吳

外謹附片具奏伏乞

聖鑒謹

奏

請提官運鹽務徵收抵撥京捐摺

光緒五年二月初八日

奏爲遵

旨抵撥部饒擬於官運局鹽務徵收項下自戊寅綱冬季起按年提撥銀兩分季解部及滇黔兩省湊抵京捐支款恭摺仰祈

聖鑒事竊

臣

前據總辦黔邊官運局建昌道唐炯詳稱該

局開辦丁丑綱官運一年期滿現在所銷正額及帶銷積滯引張並所收稅羨截釐正雜各款均經查明實數分別開單造冊奏咨核銷實計所徵銀兩連原借山東及本省鹽本五十八萬兩除已分還過銀一十三萬七千兩外現實共有成本銀一百二十餘萬兩本應將所徵各款存儲

奏稿卷十五

哭

聽候撥用惟戊寅綱已經奏明開辦滇邊及附近滇邊之十二廳縣計岸均經官運又須添設成本五十萬兩始敷周轉計惟有將前徵各項仍舊歸入本屆成本以資辦運俾免另籌爲難惟查黔邊開辦引張暢銷收數甚旺本年加辦滇岸若使辦理得手則銷引徵銀當可冀有起色現值部庫支絀之際官運既獲贏餘自應兼顧內庫以重根本茲擬自戊寅綱冬季起每年提撥官運鹽務徵收項下銀二十萬兩每季分解銀五萬兩按時解交部庫以備要需如有延欠將總辦之員奏請嚴議等情前來

臣

查該道

所詳實爲內外兼籌力顧根本起見正擬批准照辦間適

准戶部咨光緒四年十二月十四日奉

上諭前因軍務未平用款不繼不得已開捐納職藉濟饑需乃行之日久捐資之影射捐生之取巧及委員等種種弊竇不一而足與澄清吏治之道既多滯礙於饒需亦多有名無實自應卽時停止以肅政體著戶部及各省督撫通盤籌畫務將京捐局及各省捐局每年入項若干詳細查明將此項作何支用之處設法籌款相抵一面奏明停止捐輸毋得藉詞款項難籌有意延宕等因欽此並准戶部咨明遵照此次

諭旨趕緊設法籌抵奏明辦理等因前來伏思捐納本係萬不得已之舉計自開辦以來捐局林立流品日雜吏治日隳幾於無可整頓今蒙

奏稿卷十五

五

宸衷獨斷

飭下部

臣

及各疆

臣

通籌捐項籌款相抵卽行停止仰見

聖主澄敘官方莫名欽服查近日捐輸一款自以京捐爲大宗現既奉

旨停捐則

京師爲根本重地部庫支發一切需款尤爲緊要現在川省滇黔兩岸均經開辦舊制漸可規復道員唐炯辦理得法每年收數必能集成鉅款部庫亟應兼顧所有京捐抵撥一項應請卽如唐炯原議自戊寅綱冬季爲始每年在於官運局徵收項下提撥銀二十萬兩按季分解部庫卽以抵京捐支項並另籌備銀六千兩隨解交部以作停捐

後一切辦公之用此後務當年清年款如總辦局員稍涉
諉延或解不足數卽由臣奏請嚴加議處以爲貽誤軍餉
者戒至藩鹽兩庫有此格外挹注已覺寬舒其戶部指撥
常年京餉仍應責成該司道儘力籌解足額不得於官運
局籌抵二十萬數內抵撥牽混以昭核實至滇黔指局旣
奉

諭旨飭令籌抵停止臣等亟應竭力籌措抵補庶該兩省
軍餉有資而後我

聖主之良法美意刻期可行惟藩鹽兩庫實無款可籌茲
仍飭唐炯將官運妥爲辦理俾便商利民銷數日臻通暢
除解部款外再於各項下籌撥銀六萬五千兩以四萬兩

奏稿卷十五

五

解黔以二萬五千兩解滇亦自戊寅綱冬季爲始按季分
解俾抵川省捐款惟京捐局及滇黔兩省在川分設各捐
局刻下各省尙無議抵定章其何日停止刻亦尙無定限
現在川省鹽務撥解議自本年冬季爲始應請各局卽自
本年秋季起所有以前捐生一概飭令無庸分發來川以
示限制再撥抵部餉及滇黔捐餉本擬自戊寅綱春季起
因甫辦滇岸須添成本且此半年中周轉匪易是以不能
不定自戊寅綱冬季爲始撥解庶期兩無貽誤所有議於
官運戊寅綱冬季官運局鹽務徵收項下撥解部庫銀二
十萬兩暨分解銀六萬五千兩抵補京捐及滇黔各捐支
款緣由謹恭摺由驛附奏伏乞

皇太后

皇上聖鑒訓示謹
奏

奏稿卷十五

五

黔邊官運丁丑綱行銷引數經徵各款摺

光緒五年二月初八日

奏爲黔邊官運局行銷丁丑綱額積鹽引徵完引稅羨截正款暨引釐等項雜款銀數及經徵職名分繕清單恭摺仰祈

聖鑒事竊

臣

接據總辦黔邊官運局建昌道唐炯詳稱川

省每年額行黔邊水陸鹽引共折合水引一萬零四百八十一道額行近邊之敘永永甯瀘州納谿合江南川綦江江津涪州酉陽秀山黔江彭水十三廳州縣計水引三千八百六十三道兩共應徵稅羨截銀十一萬九千四百六十六兩二錢三分五釐從前商運行銷及濟楚引張邊計

奏稿卷十五

五

套搭每年約共銷黔邊額引五六千道積滯黔邊額引自三四千道至五千道不等今計改歸官運後自光緒三年十二月十五日官鹽到岸起截至四年十二月十五日一年期滿除綦岸分局另有額行富順三臺射洪蓬溪四縣計水引一百八十五道永岸分局另有水引三十道瀘州分局另有額水引五十六道南川分局另有額行射洪縣計水引四十七道涪州分局另有犍爲縣黔額水引一百二十道暨另有發商領銷各引三百八十三張均係在官運未辦之先已由鹽道發商運銷應由鹽道奏銷以歸畫一外總計丁丑全綱額行銷邊水引及兼辦近邊之十三廳州縣額行銷引均已全數銷竣並帶銷光緒元二年黔

邊積引一萬零二百八十四道八則四色例應照案由局
奏銷等情前來臣查前年奏定黔邊鹽務改爲官運商銷
章程聲明丁丑綱行黔邊引及改歸邊岸之計引由局奏
銷請展至己卯年二月扣滿一年造冊奏報茲屆官運一
年期滿據該局詳明丁丑綱邊計額引業已銷竣帶銷積
引已至八成將銷過引數徵收正款稅羨截各項及應徵
引釐黔釐引底暨籌備護本勇糧局費各雜款銀數及經
徵職名具詳到臣確加查覈無異除冊結另行題銷外謹
恭摺具奏並分繕清單恭呈
御覽伏乞

皇太后

奏稿卷十五

五

皇上聖鑒謹

奏



